

# KOULEN MWAHNAKAPW SILIMENO

*Oaralap en Pwuhk wet*

*En Asaraia eh Kapakap oh Koulen Mwahnakapw Silimeno* iei ehu ire kesempwal me kapatapatohng *Pwuken Daniel* ni mahsen en Krihs. Ire pwukat mi nanpwungen 3.23 oh 3.24 en *Pwuken Daniel* kasalehda kapakap en Asaraia oh koulen mwahnakapw silimeno mwurin Nanmwarki Nepukadnesar eh keseiraillong nan uhmw mwehl ehu.

## **Audepe ni Oaralap**

En Asaraia eh kapakap 1-22

Koasoiepen uhmw mwehlo 23-27

Koulen mwahnakapw silimeno 28-68

*En Asaraia Eh Kapakap*

<sup>1</sup> Mwahnakapw silimeno, Ananaia, Misael, oh Asaraia<sup>a</sup> eri tapihada alialuseli nan kisinieio, wiewia koulen kaping ong Koht, oh kapikapinga nin duwen Kaun lapalap.

<sup>2</sup> Asaraia eri uhdi nan kisinieio oh kapakap ni ngihl laud ni duwe met: <sup>3</sup> “Maing at Kaun, Koht en at pahpa kahlap ako, se kin kapinga oh pwongih komwi; mwaromwi en waunla kohkohlahte. <sup>4</sup> Komwi ketin wiahiongkitech dahme se warohng ale. Mehkoaros me komwi kin ketin wiahiong kiht me pwung ahsou koaros,

---

<sup>a</sup> **1:1:** ANANAIA, MISAEL, ASARAIA: Mwar pwukat iei uhdahn mwaren Sadrak, Mesak, oh Apedneko. (Tehk Dan. 1.6-7.) **1:1:** Dan. 3.23.

oh ni omwi kin ketin kadeingkitada, komwi kin ketin sapwellimaniki pwuhng pahrek ahsou koaros. <sup>5</sup> Komwi me pwung ni omwi ketikidohng kahpwal pohn Serusalem, kahnimw sarawien at pahpa kahlap ako. Se warohng ale lokolok pwuko pwehki dipat akan. <sup>6</sup> Se sapeikiong komwi, se sohpeisang komwi, oh se dipikidahr dihp koaros. <sup>7</sup> Se sohte kapwaiada mehkan me komwi ketin koasoanediong kiht se en wia. Ma se peikiong sapwellimomwi kosonned kan, se pahn paiamwahula, <sup>8</sup> ahpw met se warohng ale kadeik oh lokolok me komwi ketikidohng kiht. <sup>9</sup> Komwi ketin mweidala se en lohdi pahn manaman en aramas suwed kan, me lemei, oh imwintihti kahngohdi kei—pahn manaman en nanmwarki men me keieu suwed nin sampah. <sup>10</sup> Eri met, kiht koaros me kin patohwan pwongih komwi, se mwamwahllahr; se inenen nameneklahr oh solahr kak lokaia.

<sup>11</sup> “Se patohwan peki komwi en dehr likidmelieikitala kohkohlahte pwehki mwaromwi sarawi, komwi dehr pil ketin kauwehla sapwellimomwi inou. <sup>12</sup> Komwi dehr pil ketin katokihedi sapwellimomwi kupwurkalahngan ong kiht. Komwi ketin kapwaiada sapwellimomwi inou ong Eipraam, me komwi ketin poakohng, ong Aisek, sapwellimomwi ladu, oh ong Seikop, semen sapwellimomwi aramas en Israel kan. <sup>13</sup> Komwi ketin inoukihong irail me komwi pahn kahngederehla kadaudokarail kan rasehng usu kan pahnlahng de pihk en ni oaroahr kan. <sup>14</sup> Ahpw met, Maing at Kaun, se patohwan

malaulausangehr tohn wehi koaros; wasa koaros me se mihmi ie, se kin namenek pwehki dipat akan. <sup>15</sup> Solahr at nanmwarki, solahr at tungoal soukohp, solahr at kaun emen. Solahr at tungoal Tehnpas Sarawi, wasa se kak wia ie at tungoal meirong isihs kan, de patohwanda ie at tungoal kisakis kan, at meirong teikan, de warpwohmwahu kan; solahr wasa me se pahn wia ie at tungoal meirong kan oh ale sapwellimomwi kupwurkalahngan. <sup>16</sup> Eri, se patohdo pahn kupwuromwi ni at koluhlahr oh wiliakapwalahr nan kapehdet ni mehlel, oh pekipeki komwi en kupwurei kiht duwehte ma se patohwandahng komwi meirong isihs en sihpw wol kei oh kouwol kei oh sihmpwul wih tohto. <sup>17</sup> Komwi ketin kupwure at koluhlahr me iei at meirong ong komwi rahnwet, pwe se en kak peikiong komwi nan at mohngiong unsek. Sohte emen me likih komwi pahn nsensuwedla. <sup>18-19</sup> Eri, met se inoukidahr nan kapehdet unsek me se pahn peikiong komwi, pwongih komwi, oh kapakap ong komwi. Komwi ketin kupwurkalahngan ong kiht oh kupwurei kiht, oh dehr mweidohng se en namenekla. <sup>20</sup> Maing at Kaun, komwi ketin kapitkinkitala ehu sapwellimomwi wiewia kapwuriamwei kan; komwi ketin kawauwihala mwaromwi.

<sup>21</sup> “Komwi ketin kasarowehti oh kanamenekihala irail koaros me wiakauwehla sapwellimomwi ladu kan. Komwi ketikihsang ar kehl oh manaman oh kauwehla ar kehlail. <sup>22</sup> Re en esehla me komwihte me Kaun-o oh Koht me komwi kin ketin kakaun sampah pwon ni roson

lapalap.”

<sup>23</sup> Eri, Sapwellimen nanmwarki ladu ko me ke-  
sehlong ohl silimeno nan kisinieio ahpw sasaunki  
kisinieio soangen oil ehu, tahr, tuwi, oh dihpw  
meng. <sup>24</sup> Uwen ile en mpwulen kisinieio mihmi  
ni piht isihsek limau <sup>25</sup> oh e pil kamwasikehla  
mehn Papiilonia ko me kesikesihnen limwah.  
<sup>26</sup> Tohnleng en Koht men ahpw ketidihdo nan  
kisinieio wasa me mwahnakapw silimeno wie  
kesikesihnen ieo. E sikenla mpwulen kisinieio  
<sup>27</sup> oh kisinieng lemwulemwur ahpw lel irail, oh  
kisinieio sohte sair ohl ako de pil kauweiraila.

*Koulen Mwahnakapw Silimeno*

<sup>28</sup> Ohl silimeno ahpw tapihada wia koulen kap-  
ing pwoatet ong Koht nindokon ar mihmi nan  
kisinieio:

<sup>29</sup> “Maing at Kaun, Koht en at pahpa kahlap ako, se  
patohwan kapinga komwi.

<sup>30</sup> Sapwellimomwi mwar lingan oh sarawi  
en waunla oh lemmwin kohkohlahte.

<sup>31</sup> Koul kan en kin wiewiawi ong mwaromwi lin-  
gan kohkohlahte  
ohl kapingpen omwi ketiket recht en wiawi nan  
tehnpas

<sup>32</sup> me komwi kin ketiket ie, nan mwoalomwi  
pohn kerup kan  
ohl mahsendidohng nan wasahn me melahr  
akan.

Wahupomwi oh kapingpomwi en wiewiawi  
kohkohlahte.

- 33 Kaping en wiawi ong komwi ni omwi ketiket  
nan mwoalen sapwellimomwi wehi.  
Koul kan en kin wiawi ong mwaromwi lingan  
kohkohahte.
- 34 Kaping en wiawi ong komwi pohn pweleng en  
nanleng kan.  
Koul kan en kin wiawi ong mwaromwi lingan  
kohkohahte.
- 35 “Kumwail kapinga Kaun-o, kumwail koaros me  
wiepen nin limen Kaun-o;  
kumwail koulkihong koulén kaping oh  
wauneki kohkohahte.
- 36 Kumwail kapinga Kaun-o, kumwail pahnlahng  
kan;  
kumwail koulkihong koulén kaping oh  
wauneki kohkohahte.
- 37 Kumwail kapinga Kaun-o, kumwail sapwelli-  
men Kaun-o tohleng kan koaros;  
kumwail koulkihong koulén kaping oh  
wauneki kohkohahte.
- 38 Kumwail kapinga Kaun-o, kumwail pihl kan  
koaros me mi pohnangin pahnlahng;  
kumwail koulkihong koulén kaping oh  
wauneki kohkohahte.
- 39 Kumwail kapinga Kaun-o, kumwail me mana-  
man koaros en nanleng;  
kumwail koulkihong koulén kaping oh  
wauneki kohkohahte.
- 40 Kumwa kapinga Kaun-o, kumwa ketipin oh  
maram;  
kumwa koulkihong koulén kaping oh  
wauneki kohkohahte.
- 41 Kumwail kapinga Kaun-o, kumwail usu kan en  
nanleng;

- kumwail koulkihong koulén kaping oh wauneki kohkohahte.
- 42 Kumwa kapinga Kaun-o, kumwa keteu oh pwoaik;  
kumwa koulkihong koulén kaping oh wauneki kohkohahte.
- 43 Kumwail kapinga Kaun-o, kumwail kisinieng kan;  
kumwail koulkihong koulén kaping oh wauneki kohkohahte.
- 44 Kumwa kapinga Kaun-o, kumwa kisiniei oh karakar;  
kumwa koulkihong koulén kaping oh wauneki kohkohahte.
- 45 Kumwail kapinga Kaun-o, kumwail ahnsoun kopou laud oh karakar laud kan;  
kumwail koulkihong koulén kaping oh wauneki kohkohahte.
- 46 Kumwail kapinga Kaun-o, kumwail pwoaik kan oh sinoh kan;  
kumwail koulkihong koulén kaping oh wauneki kohkohahte.
- 47 Kumwail kapinga Kaun-o, kumwail pwohng kan oh rahn akan;  
kumwail koulkihong koulén kaping oh wauneki kohkohahte.
- 48 Kumwa kapinga Kaun-o, kumwa marain en rahn oh rotorot;  
kumwa koulkihong koulén kaping oh wauneki kohkohahte.
- 49 Kumwa kapinga Kaun-o, kumwa aihs oh kopou;  
kumwa koulkihong koulén kaping oh wauneki kohkohahte.
- 50 Kumwa kapinga Kaun-o, kumwa aihs oh sinoh;

- kumwa koulkihong koulen kaping oh wauneki kohkohahte.
- 51 Kumwail kapinga Kaun-o, kumwail lioal oh depwek en melimel kan; kumwail koulkihong koulen kaping oh wauneki kohkohahte.
- 52 “Kapinga Kaun-o, kowe sampah; koulkihong koulen kaping oh wauneki kohkohahte.
- 53 Kumwail kapinga Kaun-o, kumwail nahna kan oh dohl kan; kumwail koulkihong koulen kaping oh wauneki kohkohahte.
- 54 Kumwail kapinga Kaun-o, kumwail koaros me kin wosada; kumwail koulkihong koulen kaping oh wauneki kohkohahte.
- 55 Kumwail kapinga Kaun-o, kumwail leh kan oh pillap akan; kumwail koulkihong koulen kaping oh wauneki kohkohahte.
- 56 Kumwail kapinga Kaun-o, kumwail utuhn pihl kan; kumwail koulkihong koulen kaping oh wauneki kohkohahte.
- 57 Kumwail kapinga Kaun-o, kumwail roahs kan oh audepen nan madau kan; kumwail koulkihong koulen kaping oh wauneki kohkohahte.
- 58 Kumwail kapinga Kaun-o, kumwail menpihr kan koaros; kumwail koulkihong koulen kaping oh wauneki kohkohahte.

- 59 Kumwail kapinga Kaun-o, kumwail kou kan  
 koaros oh mahn lawalo koaros;  
 kumwail koulkihong koulén kaping oh  
 wauneki kohkohahte.
- 60 “Kumwail kapinga Kaun-o, kumwail tohn sam-  
 pah koaros;  
 kumwail koulkihong koulén kaping oh  
 wauneki kohkohahte.
- 61 Kumwail kapinga Kaun-o, kumwail mehn Israel  
 kan;  
 kumwail koulkihong koulén kaping oh  
 wauneki kohkohahte.
- 62 Kumwail kapinga Kaun-o, kumwail sapwelli-  
 men Kaun-o samworo kan.  
 kumwail koulkihong koulén kaping oh  
 wauneki kohkohahte.
- 63 Kumwail kapinga Kaun-o, kumwail sapwelli-  
 men Kaun-o ladu kan;  
 kumwail koulkihong koulén kaping oh  
 wauneki kohkohahte.
- 64 Kumwail kapinga Kaun-o, kumwail aramas  
 loalopwoat kan koaros;  
 kumwail koulkihong koulén kaping oh  
 wauneki kohkohahte.
- 65 Kumwail kapinga Kaun-o, kumwail koaros me  
 sarawi oh mpahi;  
 kumwail koulkihong koulén kaping oh  
 wauneki kohkohahte.
- 66 Kumwail kapinga Kaun-o, kumwail Ananaia,  
 Asaraia, oh Misael;  
 kumwail koulkihong koulén kaping oh  
 wauneki kohkohahte.
- E ketin kapitkitailsang nan wasahn me melahr  
 akan



oh doareiketailsang pahn manaman en  
mehla.

E ketikinkitailieisang nan uhmw mwehlo

oh doareiketailsang nan kisinieio.

<sup>67</sup> Kumwail kapingkalahngan ong Kaun-o, pwe ih  
me ketin kupwur mwahu

oh sapwellime kalahngan kin poatopaat.

<sup>68</sup> Kumwail kapinga Kaun-o, kumwail koaros me  
kin pwongih;

kumwail kapinga Koht en koht akan oh kap-  
ingkalahngan ong ih,

pwe sapwellime kalahngan me poatopaat.”

**Pohnpeian Bible with Apocrypha**  
**The Holy Bible in the Pohnpeian language of the**  
**Federated States of Micronesia**

copyright © 2006 Bible Society of the South Pacific

Language: Pohnpeian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-09-08

---

PDF generated using Haiola and XeLaTeX on 11 Nov 2022 from source files dated 9 Oct 2020

7ff9a0a6-6024-5540-a190-762a68918ebc